

律
隸
初
書

神珠神書

序

漢制載於史者先儒攷之詳矣其見他書者未之
攷也嘗謂法始乎伏羲而成乎堯三代損益至周
大備夫子從周與從先進之言所謂百世可知者
其法著于春秋東遷之初先王典章槩有存者義
和拒鬯之賚王命猶重也司徒緇衣之美王官猶
賢也祭仲論京不度過制之城猶未衆也無駭卒
始請族世官之敝猶未遠也泰山有祊則廵守之

蹟猶可復也九宗五正有後則封建之制猶可尋也師服之言建國臧僖伯之諫觀魚則據經守古之士猶多也春秋何爲而作乎宰咺歸贈天衷民彝大泯亂春秋所以始歟於獻六羽於稅畝皆曰初於丘甲於三軍皆曰作於南門於雉門及兩觀皆曰新作夫子蓋傷之也秦作西時臚於郊祀魯惠公請郊禘史角實往而祀禮始僭矣其後齊作內政而兵制變晉作爰田而田制變晉作執秩而

官制變鄭鑄刑書而刑制變大夫奏肆夏季氏旅
泰山晉不知殺烝魯不知尚羔禮幾亡矣然名卿
大夫講聞故實三代文獻藹如也納鼎有諫觀社
有諫申繻名子之對里革斷罟之規御孫別男女
之贊管仲辭上卿之饗柳下季之述祀典單襄公
之述夏令秩官魏絳之述夏訓虞箴郊子能言紀
官州鳩能言七律子革倚相能誦祈招懿戒觀射
父之陳祭祀閔馬父之稱商頌格言猷訓粲然可

睹齊虞人之守官魯宗人之守禮懔懔秋霜夏日
之嚴劉子所云天地之中子產所云天地之經胥
臣敬德之聚晏子禮之善物又皆識其大者統紀
相承淵原相續得夏時坤乾見易象魯春秋而知
三代之禮所以扶持於未墜者豈一人之力哉戰
國去籍之餘孟子言井地曰大畧言班爵祿曰聞
其畧言諸侯喪禮曰未學而嘗聞若其宏綱丕式
因畧而致詳推舊而爲新聖人復起不能易也春

秋大復古譏變古井牧變而阡陌畿服變而郡縣
車乘變而步騎什一變而箕斂佩玉變而帶劔簪
席變而杯案生民之理有窮則聖王之法可改古
其不可復乎是意唯太史公知之於夏殷紀舉孔
子正夏時善殷輅卓然見損益之要指於高帝紀
曰朝以十月車服黃屋左纛蓋歎其襲秦也漢之
止於爲漢自高帝之襲秦始雖然兩漢之制文中
子奚取焉吁三代遠矣漢詔令人主自親其文猶

近於書之典誥也郎衛執戟之用儒生猶近於王
宮之士庶子也司徒府有百官朝會殿以決大事
猶近於外朝之詢衆也牧守有子孫郡國有辟舉
庶幾建侯之舊丞相進見御坐爲起在輿爲下庶
幾敬臣之意三老掌教化孝悌力田置常員鄉遂
之流風遺韻亦間見焉是之取爾君子尚論古之
人以爲漢去古未遠諸儒佔畢訓故之學雖未盡
識三代舊典而以漢制證遺經猶幸有傳注在也

冕服車旗彝器之類多以叔孫通禮器制度爲據
其所臆度無以名之則謂若今某物及唐儒爲疏
義又謂去漢久遠雖漢法亦不可攷蓋自西晉板
蕩之後見聞放失習俗流敗漢世之名物稱謂知
者鮮焉況帝王制作之法象意義乎此漢制之僅
存於傳注者不可忽不之攷也愚少嘗有聞老弗
敢墜因紬次爲編以俟後之君子自流遡原三代
之禮庶乎其可識矣辛巳夏五子王子序

漢制攷卷之一

浚儀王應麟伯厚甫著

海虞毛晉子晉甫閱

周禮

胥徒注此民給徭役者若今衛士矣疏衛士亦

給徭役故舉漢法況之

貢禹傳諸離宮及長樂宮衛可減太半寬繇

役

膳夫注今時美物曰珍膳

酒人注奄今謂之宦人 古者從坐男女没人縣

官爲奴其少才知以爲奚今之侍史官婢或曰
奚官女 疏侍史官婢舉漢法言之或曰官女
者漢時有此別號案左氏晉惠公之女名妾稱
爲官女謂宦事秦公子亦云宦女也

貢禹傳諸官奴婢十萬餘人

大府注大府爲王治藏之長若今司農矣 疏漢

時司農主府藏故史游章云司農少府國之淵
司會注司會主天下之大計計官之長若今尚書
疏漢之尚書亦主大計故舉以況之也

成帝紀建始四年罷中書宦官初置尚書員
五人

職內注職內主入也若今之泉所入謂之少內
疏漢之少內亦主泉所入案王氏漢官解云小
官嗇夫各擅其職謂倉庫少內嗇夫之屬各自

擅其條理所職主由此言之少內藏聚似今之少府但官卑職碎以少爲名

丙吉傳少內嗇夫白吉曰食皇孫亡詔令注云少內掖庭主府藏之官也

大宰八法注鄭司農云官屬謂六官其屬各六十若今博士大史大宰大祝大樂屬大常也 疏漢始叔孫通爲奉常後改爲大常

八則注祿若今月奉也 疏古者祿皆月別給之

漢之月奉亦月給之

九職注鄭司農云閒民謂無事業者轉移爲人執事若今傭賃也

九賦注賦口率出泉也今之算泉民或謂之賦此其舊名與疏漢法民年二十五已上至六十出口賦錢人百二十以爲算

食貨志董仲舒曰田租口賦二十倍於古

貢禹傳古民亡賦算口錢起武帝征伐四夷

重賦於民民產子三歲則出口錢故民重困
宜令兒七歲去齒乃出口錢年二十乃算元
帝令民產子七歲乃出口錢 鹽鐵論曰雖
三十而以頃畝出稅加之以口賦更繇之役
理道要訣漢高帝每歲人常賦百二十錢
至孝文時省儉減至四十武帝事邊費廣人
產子三歲則出口錢孝宣減人算三十孝成
減四十光武有產子復以三年之算

關市山澤謂占會百物幣餘占賣國中之斥幣皆
末作當增賦者若今賈人倍算矣

小宰注宮刑在王宮中者之刑建明布告之糾猶
割也察也若今御史中丞疏應劭云秩千石
朝會獨坐副貳御史大夫內掌蘭臺圖籍外督
刺史糾察百寮故舉漢法況之

八成注鄭司農云質劑謂市中平賈今時月平是

也

平音
病

傳別質劑皆今之券書也

歲終則今群吏致事注使齋歲盡文書來至若今
上計 疏漢之朝集使謂之上計吏謂上一年
計會文書及功狀也

憲禁于王宮注憲謂表縣之若今新有法令云
宰夫八職注治要若歲計也治凡若月計也治目
若今日計也

贊治若今起文書草也 疏起文書草乃後判決